

Namminersorlutik Oqartussat arnanut nakuusertarneq angerlarsimaffimmilu nakuusertarneq pitsaaliorniarlugit akiorniarlugillu Europarådip isumaqatigiissutaanik (Istanbulimi Isumaqatigiissummik) atortuulersitsinissaq pillugu Inatsisartut aalajangiiffigisassaattut siunnersuut.

(Meeqqanut, Inuusuttunut Ilaqutariinnullu Naalakkersuisoq)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Aappassaaneerneqarnera

Istanbulimi Isumaqatigiissummik atortuulersitsinissamut Inatsisartut aalajangiiffigisassaattut siunnersuummut atatillugu Inatsisinut Ataatsimiititaliaq suliaqarluarsimaneranut Naalakkersuisut qujassuteqarput.

Naalakkersuisut nuannaarutigaat Inatsisartuni aappassaaneerinninnermi siunnersuutip akuersissutigineqarnissaa ataatsimiititaliap isumaqatigiittup inassutigimmagu.

Ataatsimiititaliaq atortuulersitsinissamut ernumassuteqarmat Naalakkersuisut paasinnipput, ingammik qimarnguinnut, oqarasuaatikkut siunnersortinnissamut neqeroorummut kiisalu isumaqatigiissummik atortuulersitsinissamut aningaasatigut kingunerisassanut tunngatillugu. Naalakkersuisut tamatumunnga paasinnilluarput. Qimarnguiit oqarasuaatikkullu siunnersuiviit arnanut ilaqutariinnullu nakuusernermut atatillugu eqqugaaqqasunut illersuinissamut sakkussani pingaaruteqarnerpaapput. Taamaattorli pingaaruteqarpoq eqqaamanissaa isumaqatigiissummik atortuulersitsinissamut, massakkuugaluarpat kingusinnerugaluarpalluunniit, tamakkiisumik eqquutsitsinissaq piumasqaataanngimmat. Istanbulimi isumaqatigiissut naalakkersuinikkut nalunaarutaavoq nunarsuarlu tamakkerlugu isumaqatigiissutaalluni, taanna inuiaqatigiinni nakuusertarneq akiorniarnissaanut pisussaaffiliinissamut annertuumik tunngavissamik pilersitsisussaq.

Naalakkersuisut qanigisariinni nakuusertarneq akiorniarlugu iliuusissatut pilersaarummik massakut suliaqarput. Iliuusissatut pilersaarut qimarnguinnik ukkatarinninnermik aammalu nunatsinni qimarnguiit amerlassusaannut pisariissusaannullu atatillugu ataatsimiititaliap ernumassutsiminik oqaaseqarneranik ilaatigut imaqarpoq.

Pingaaruteqarpoq nakuusernikkut eqqugaaqqasut piaarnerpaamik siunnersorneqarnissaannut tapersorneqarnissaannullu periarfissaqarnissaat. Tamanna piffissami ulloq unnuarlu atuuppoq. Taamaattumik ulloq unnuarlu oqarasuaatikkut neqeroorutip atuutsinnissaanut pingaaruteqarnerata Naalakkersuisut isumaqatigaat. Taamaattumillu Naalakkersuisut ulloq unnuarlu sulisoqarluni oqarasuaatikkut siunnersuivik, Tusaannga, akeqarunnaarnissaa sulissutigaa.

Isumaqatigiissutip atortuulersinnissaanut aningaasatigut kingunerisassanik ersarissanissamut ataatsimiititaliap peqqussutaa Naalakkersuisut tusarpaat. Qanigisariinni nakuusertarneq akiorniarlugu iliuusissatut pilersaarutissap aappariinnermi nakuusertarneq qanoq pitsaaliorsinnaanerlugu iliuuseqarfigisinnaanerlugulu ersarissassavaa. Suliassaqarfimmut qanoq pitsaanerpaamik aningaasaliisinnaanissarput eqqarsaatigalugu pingaarnersiuinnermi ilisimasaq taanna pingaarnertut suliniutaassaaq.

Taamatut oqaasertalerlugu Naalackersuisut aappassaaneerinninnissamut siunnersuuteqarput.